




Pranuar / Dorezuar Prinjenal/Prodato Received/Delivery	23.12.2022	2	viti god year
Organ /Njësia Organ /Jedinica Org./Unit	Nr. Prot Br. Prot Prot No	Shtojca Prilog Appendix	Sasia Kolicina Quantity
SKIPNSHUK	8423/2022		1/4



Republika e Kosovës
Republika Kosova - Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.1108/2022

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Ardita Haxhnikaj-Demi-kryetare, Eshref Shabani dhe Malsore Gashi-Bajraktari-anëtarë, me Avdyl Bekteshi-Zyrtar i Lartë për Bashkëpunim Profesional në cilësinë e procesmbajtësit, ka shqyrtuar ankesën me numër A.nr.1108/2022 të datës 07.12.2022 të parashtruar nga ankuesi [redacted] me adresë [redacted], në çështjen juridike "shkelje e të drejtës në pagë", duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3 dhe nenin 18 paragrafin 1 nën paragrafin 1.2 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datë 23.12.2022, njëzëri mori këtë:

V E N D I M

- I. *Aprovohet si e bazuar* ankesa me numër A.nr.1108/2022 e datës 07.12.2022 e parashtruar nga ankuesi [redacted]
- II. **Obligohet** Kryetari i Komunës së Lipjanit, që brenda afatit prej pesëmbëdhjetë (15) ditësh nga data e pranimit të këtij vendimi, të inicioj veprimet e nevojshme ligjore për harmonizimin e koeficientit të nëpunësit civil [redacted] nga koeficienti gjashtë (6) në koeficientin tetë (8) të pagës.
- III. Këshilli i Pavarur Mbikëqyrës për Shërbimin Civil të Kosovës duhet të njoftohet me shkrim lidhur me veprimet e ndërmarra për zbatimin e këtij vendimi.

A r s y e t i m

Ankuesi [redacted] i punësuar në Komunën e Lipjanit, më datë 07.12.2022 ka parashtruar ankesë me numër protokolli 7721/2022 në Këshillin e Pavarur Mbikëqyrës për Shërbimin Civil të Kosovës, kundër përgjigjes me numër reference 01-120/04-63300 të datës 30.11.2022 të Udhëheqësit të Burimeve Njerëzore të Komunës së Lipjanit lidhur me kërkesën e ankuesit për harmonizim të koeficientit të pagës nga koeficienti gjashtë (6) në koeficientin tetë (8), për shkak të shkeljeve të dispozitave materiale, shkeljeve të dispozitave procedurale dhe diskriminimit në shpërbllim në page konform kategorisë, nivelit profesional dhe gradës.

Këshilli i Pavarur Mbikëqyrës për Shërbimin Civil të Kosovës bazuar në dispozitat e Rregullores Nr.02/2018 për Procedurën e Shqyrtimit dhe Vendosijes së Ankesave, më datë 13.12.2022 ka proceduar kërkesën për përgjigje në ankesë në Komunën e Lipjanit. Ndërsa, Këshilli më datë më datë 19.12.2022 ka pranuar përgjigje në ankesë se bashku me provat e lëndës.

Kolegji për Shqyrtimin dhe Vendosijen e Ankesave ka administruar këto prova: Ankesën me numër të protokollit 7721/2022 të datës 07.12.2022 të parashtruar nga ankuesi në Këshillin Pavarur Mbikëqyrës për Shërbim Civil të Kosovës; Përgjigje në kërkesë me Nr. 1-120/04-63300 të datës 30.11.2022 të Udhëheqëses së Personelit; Kërkesën për ndryshimin e koeficientit e datës 24.11.2022 e ankuesit; Akt Emërimit të datës 10.07.2013 të ankuesit; Kërkesën për përgjigje në ankesë me numër protokollit 7999/2022 e datës 13.12.2022; Përgjigjen në ankesë e datës 19.12.2022; Listën e Pagave shtator, tetor dhe nëntor 2022; Emailin e datës 10.11.2022 dhe 20.12.2022 nga Departamenti për Menaxhimin e Zyrtarëve Publikë i Ministrisë së Punëve të Brendshme.

Kolegji për Shqyrtimin dhe Vendosijen e Ankesave pasi ka shqyrtuar çdo provë veç e veç dhe të gjitha provat së bashku, si dhe bazuar në rezultatin tërësishëm të shqyrtimit administrativ, konstatoi se është e bazuar ankesa e ankuesit, **SEPSE:**

Nga administrimi i provave të lëndës rezulton së ankuesi është i punësuar në Komunën e Lipjanit, gjegjësisht i njëjti sipas Aktit të Emërimit të datës 10.07.2013 është emëruar dhe ushtron pozitën e punës me titull *Inspektor i Mjedisit-Ambientit* me koeficient të pagës gjashtë (6). Ndërsa sipas listës së pagave konfirmohet së i njëjti ka të përcaktuar për këtë pozitë pune kategorinë profesional 1.

Ankuesi me datën 24.11.2022 ka parashtruar kërkesë me numër protokollit 01-120/011-63300 tek Udhëheqësi i Personelit të Komunës së Lipjanit për harmonizimin e koeficientit të pagës nga gjashtë (6) në tetë (8), ndërsa, Udhëheqësi i Burimeve Njerëzore në përgjigje të datës 30.11.2022 ka njoftuar ankuesin së komuna ka ndërmarr veprimet të vazhdueshme për harmonizim të koeficienteve por nuk kemi marr përgjigje pozitive nga institucionet gjegjëse.

Ankuesi në ankesën e parashtruar në Këshillin e Pavarur Mbikëqyrës për Shërbim Civil të Kosovës, pretendon së ka qenë i diskriminuar për faktin se i njëjti ka koeficient të pagës me të vogël së koleget e tij në të njëjtën pozitë, kërkon që Këshilli në pajtim me legjislacionin në fuqi të njoht të drejtën e harmonizimit të koeficientit nga gjashtë (6) në koeficientin tetë (8).

Lidhur me pretendimin e ankuesit për harmonizim të koeficientit të pagës, Kolegji i Këshillit i'u referua nenit 19 të Ligjit Nr.06/L-114 për Zyrtarët Publikë më të cilin është përcaktuar se: *"Zyrtari publik ka të drejtë në pagë dhe shpërblim për punën e kryer si dhe shtesa të përcaktuara me Ligjin e Pagave"*, si dhe nenit 3 paragrafit 2 të Ligjit Nr.03/L-147 për Pagat e Nëpunësve Civilë më të cilin parashihet se: *"Institucionet e administratës publike të Republikës së Kosovës janë të detyruara të paguajnë pagë të njëjtë për punën me vlerë të njëjtë"*. Andaj, mbi këtë bazë ligjore e nisur nga konstatimi si më lartë se ankuesi është emëruar në pozitën e *Inspektorit të Mjedisit-Ambientit* me koeficient gjashtë (6) të pagës klasa profesional 1, si dhe duke u bazuar në shkresën e datës 19.08.2022 dhe 20.12.2022 të Departamentit për Menaxhimin e Zyrtarëve Publik si organ



përgjegjës për përgatitjen dhe mbikëqyrjen e zbatimit të politikave për pagat e zyrtarëve publikë, me të cilin është konfirmuar se pozita inspektor-klasa profesionale 1, ka të përcaktuar koeficientin tetë (8) të pagës, Kolegji i Këshillit konstaton se pretendimi ankimor i ankuesit për harmonizimin të koeficientit të pagës me titullin e punës është i drejtë dhe i ligjshëm.

Rrjedhimisht Kolegji, konstaton se mos realizimi i pagesë së njëjtë për punë të njëjtë paraqet trajtim jo të barabartë dhe diskriminues në raport me ankuesin ashtu siç është përcaktuar me nenin 4 paragrafi 1 Ligjit Nr.05/L-021 për Mbrojtje nga Diskriminimi ku thuhet se: "Diskriminimi i drejtpërdrejtë konsiderohet kur një person trajtohet në mënyrë më pak të favorshme sesa trajtohet, ka qenë i trajtuar ose do të trajtohet një person tjetër në një situatë të krahasueshme, sipas një apo më shumë nga bazat e përcaktuara në nenin një (1) të këtij Ligji, dhe se trajtimi jo i barabartë i të punësuarve në kuptim të së drejtës së pagës është në kundërshtim të plotë edhe me nenin 7 paragrafi 1 të Ligjit për Zyrtarët Publikë më të cilin është përcaktuar se: "1. Menaxhimi i marrëdhënies juridike me nëpunësit civilë, me nëpunësit e Shërbimit Publik dhe me nëpunësit administrativo-teknikë dhe mbështetës, udhëhiqet nga ligji dhe bazohet, gjithashtu, në parimin e mundësive të barabarta, meritës, transparencës, profesionalizmit dhe paanësisë politike, mos diskriminimit, përfaqësimit të drejtë gjinor dhe të komuniteteve dhe synon garantimin e qëndrueshmërisë dhe vazhdimësisë në detyrë..." Kolegji i Këshillit konstaton se pretendimi ankimor i ankuesit për harmonizimin të koeficientit të pagës me titullin e punës është i drejtë dhe i ligjshëm. Kështu që bazuar në këto rrethana, Kolegji i Këshillit konstaton se në ketë çështje administrative janë përmbushur kushtet ligjore për aprovimin e tërësishëm të ankesës së ankuesit duke i dhënë të drejtë ankuesit për rregullimin e koeficientit të pagës nga gjashtë (6), në tetë (8), për pozitën e punës Inspektor i Mjedisit-Ambientit.

Andaj, theksuar si me sipër, obligohet Kryetari i Komunës që brenda fatit prej pesëmbëdhjetë (15) ditësh nga data e pranimit të këtij vendimi, të ndërmerret të gjitha veprimet e nevojshme ligjore-administrative për harmonizimin e koeficientit ankuesit siç përcaktohet në pikën II të dispozitivit.

Theksuar si me sipër, e duke u bazuar në nenin 18 paragrafin 1 nën paragrafin 1.2 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji vendosi si në dispozitiv të këtij vendimi.

Vendimi hyn në fuqi ditën e nënshkrimit nga Kryetarja e Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
LËNDA ME NUMËR A.NR.1108/2022

Avdyll Bekteshi

Procesmbajtës

Ardita Haxhnikaj-DEMI

Kryetare e Kolegjit

Vendimi i dërgohet:

- Ankuesit,
- Kryetarit të Komunës së Lipjanit;
- Udhëheqësit të Personelit në Komunën e Lipjanit; dhe
- Arkivit të KPMSHCK-së.

